

E Gana pa Gana

Naturalesa di hende no a kambia dor e síglonan. Kasi 2000 aña pasá, apòstel Pablo a skirbi, “...*esnan ku kier bira riku ta kai den tentashon i den trampa i den hopi deseonan loko i dañino, kualnan ta hundi hende den ruina i destrukshon*” (1 Timoteo 6:9). E palabranan aki ta mes bèrdat awe ku e tempu ei. Ta parse ku hopi hende na nos islanan tin masha gana pa rikesa, i ta haña nan den un abismo, nèt manera Beibel ta bisa.

Un evidensia di nos set pa sèn ta nos deboshon “sagrado” pa ku weganan di plaka. Hopi habitante di nos islanan ta fanatiko di kasino, katochi, òf loteria. No ta importá si e weganan ta legal òf ilegal. Na algun bario, tur djasabra atardi, sierto kas ta yen di hende skuchando radio ku hopi atenshon, sperando ku e biaha aki si nan por gana ku kareda di kabai. E gana pa gana un suma supstansial den un será di wowo tin hopi hende dominá.

Maske kon importante un programa na televishon por ta (sea ta eleksjon, reportahe di un katástrofe, òf final di kampionato) tur dia nos mester soportá un interupshon molestioso pa wak kuater mashin sende i paga tres biaha pa haña sa kua numbertan ta sali e dia ei. Nos ta haña impresjon ku eventonan importante di mundu por para, ma wega di number no por para pa nada! Mundu por kaba mes, ma wega di number si mester sigui!

Poko aña pasá gobièrno a legalisá kantornan di number. Den un anochi, na nos isla (ku e tempu ei tabatin solamente un botika, i kuater dòkter pa trata e enfermedatnan di su 11.177 habitante) tabatin alredero di 52 ofisina di number pa sirbi esnan infektá ku e “gana pa gana!” E un echu ei so ta indiká bon kla ku hopi suidadano ta drispidí un bòshi di sèn na weganan di plaka. Asta redusiendo e kantidat di kantor, no a kura nos pashon pa plaka.

Segun estudionan hasí na Merka, hende di ménos rekursu tin dos bes mas tendensia pa hunga weganan di plaka ku hende ku mas sèn. Hende pober tambe ta gasta un porsentaha mas grandi di nan entrada ku hende ku mas rekursu. Den un estudio, mas ku 33% di famianan pober ta gasta 20% di nan entrada pa loteria. Hopi biaha gobernantenan ta faboresé loteria, pensando ku gobièrno lo haña mas sèn dor di e wega aki pa nan por proveé edukashon, kuido médiko, trabou, i bibienda pa esnan den nesesidat. Ma nan ta ignorá e echu iróniko ku di bèrdat **nan ta kobra e pobernan pa proveé pa e pobernan!**

Ta un sekretu públiko ku kobradónan di ònderstant i hende ku debe ta purba rende e poko plaka ku nan tin na kasino òf otro wega di plaka. Tampoko no ta un echu desconosí ku den e gran mayoria kaso, nan ta haña nan den un buraku finansiero mas hundu.

Tambe ta un echo ku **weganan di plaka kasi semper ta guia na mas pobresa**. Méskos ku droga, e bisio aki por bira un adikshon ku finalmente por demandá bo delaster sèn. No ta un kaso eksepsjonal ku un hende ku ta hunga e weganan aki ta pèrdè su sèn, su trabou, i asta su famia. I hopi bes adiktonan di weganan di plaka ta bira adikto di alkohòl òf droga, i asta ta kometé krímen òf suisidio.

Dios ta bisa bon kla ku mayornan ta responsabel pa sòru pa nan famia. “*Ma si un hende no proveé pa su mes hendenan, i specialmente pa esnan di su kas, el a nenga e fe i ta pió ku un inkrédulo*” (1 Timoteo 5:8). Ma hopi tata i mama ta usa e sèn ku nan yunan tin mester pa kuminda i otro nesesidat pa nan por kumpra brièchi, bai kasino, òf gosa di kareda di kabai ku nan amigunan. Hopi biaha ta nèt e sèn ku famianan di ménos rekursu tin mester, ku ta malgastá ku weganan di plaka.

Segun Palabra di Dios, “*Esun ku ta haragan pa ganashi ta tormentá su mes kas...*” (Proverbionan 15:27). Dios tin rason! **Bo ta buska problema so pa bo mes i bo famia ku bo gana pa gana.**